

Siasat semula 1MDB antara cabaran PAC

Malaysiakini

7 Ogos 2018

Shakira Buang

Jawatankuasa Kira-kira Wang Negara (PAC) kini berdepan tugas berat apabila terpaksa mengembalikan semula keyakinan rakyat terhadapnya untuk melaksanakan tanggungjawab yang diamanahkan.

Dan bagi melaksanakan tugas itu, Timbalan Pengerusi PAC, Wong Kah Woh, berkata pihaknya bercadang untuk membuka semula siasatan terhadap isu 1MDB.

“PAC yang baru haruslah mampu menebus kembali kepercayaan dan keyakinan rakyat.

“Sebagai permulaan kepada tugas yang diamanahkan, saya akan berbincang dengan pengerusi dan ahli-ahli PAC supaya penyiasatan terhadap skandal 1MDB dibuka semula.

“Selain itu laporan yang lebih komprehensif serta lengkap dengan mengambil kira keterangan-keterangan baru dapat dibentangkan ke parlimen,” katanya

dalam sidang media di lobi parlimen, hari ini.

Majoriti ahli Dewan Rakyat hari ini bersetuju memilih Datuk Seri Ronald Kiandee (BN-Beluran) sebagai pengerusi PAC. Wong pula dilantik menjadi timbalan Ronald.

Mengikut peraturan PAC perlu dianggotai sekurang-kurangnya enam orang dan tidak melebihi 12 orang.

Pengumuman itu dibuat oleh Speaker Dewan Rakyat Datuk Mohamad Ariff Md Yusoff sewaktu mempengerusikan mesyuarat Dewan Rakyat hari ini.

Pemilihan kedua-dua mereka sah selepas majoriti ahli Dewan Rakyat bersetuju dengan usul yang dibentangkan Menteri di Jabatan Perdana Menteri Datuk VK Liew semasa persidangan.

Sementara itu, mengulas lanjut Wong berkata PAC juga akan mengeratkan lagi hubungan dan kerjasama dengan Jabatan Audit Negara selain melancarkan siasatan terhadap kepincangan dan salah laku yang dilaporkan jabatan tersebut.

Tambah Wong, pihaknya juga akan berbincang dengan pengerusinya supaya sesi pendengaran PAC boleh dibuat secara terbuka pada masa hadapan.

“Pendengaran PAC pada masa depan akan dapat di buka kepada orang ramai demi menjamin taraf ketelusan yang tinggi, kecuali perkara-perkara yang melibatkan keselamatan negara atau keadaan-keadaan luar biasa,” katanya.

Menurut Wong, PAC juga akan meneliti undang-undang yang sedia ada untuk memastikan bahawa perlindungan undang-undang ke atas pemberi maklumat (whistleblower) atau saksi-saksi yang melaksanakan tanggungjawab nasionalnya kepada PAC memadai atau tidak.

Copyright © 1999-2012 Mkini Dotcom Sdn. Bhd

Source: <https://www.malaysiakini.com/news/437810>